





玄象山館詩草卷第一

內史南師仲子興著草

東萊原一魁仲文選正

蘄春寇學海巨源編閱

魏郡崔邦亮德嚴校梓

弟南企仲伯稚菟集

四言古詩

將進酒



白日西邁黃河東流生不滿百千歲胡憂  
尊爵榮名于身何有可以娛顏唯我斗酒  
嘉賓在堂銀燭煌煌青娥皓齒寶瑟瓊漿  
以獻以酬載歌載嘆盛筵難逢良辰易換  
東方既明樂事無多勸君不欲將柰君何

拊劍篇

深山虎嘯大澤龍吟茫茫宇宙寥寥我心  
一解 魚目亂珠燕石混玉尼父絕糧荆和

剛足二解 生長西鄙志在邊疆十年未達  
雄心不忘二解 丘壑非庸冠簪非桀拊劍  
長歌雙眸盡裂四解

結客少年場

結客少年裘馬翩翩朝走新豐暮宿邯鄲  
當鑪進觴夾坐鳴絃慷慨中夜仗劍當筵  
弟畜荆軻兄事虞卿左揖聶政右睇侯嬴  
片言相諾義重身輕狂來一呼風起雲橫



既日報恩豈不報讐嗟彼飲器誰者之頭  
死即鬼厲生當為侯百年有盡托名千穉  
善哉行

鑑磨則光玉剖則良世情變幻君子守常  
冷如寒泉直如弧矢時行則行時止則止  
孔歎水逝揚悲路岐矧伊人矣胡不爾思  
嗟嗟宇宙頽仰寥廓我生其間孰憂孰樂  
登山采薇出門種瓜三公不易千駟何加

雜詩集論語

多學而識約之以禮能近取譬為仁由已  
吾見其進死而後已其一吾已矣夫在陳  
絕糧道之將廢子畏於匡毋意毋必舍之  
則藏其二韞匱而藏不攸不求君子上達  
惡居下流學者為己樂以忘憂其三學而  
不厭耨而不輟食無求飽誦詩三百莫我  
知也仲尼日月其四明日遂行退而學詩

今之從政吾不知之君子固窮何以文為  
其五 文王既沒鳳鳥不至得見君子可以  
為次人能弘道百工居肆其六 居無求安  
行不由徑蔬食飲水非敢為佞苟患失之  
無德而稱其七 患所以立守死善道群居  
終日犯而不校是亦為政從吾所好其八  
為政以德脩己以敬直道而行於斯為盛  
苟有用我孰敢不正其九 正其衣冠則以

學文學如不及唯恐有聞加我數年何事  
於仁其十 仁遠乎哉文行忠信躬行君子  
其言也訥予所否者使驕且吝其十一 泰  
而不驕貞而不諒斗筭之人焉用彼相可  
與共學中人以上其十二 善與人交不為  
酒困斐然成章世叔討論孝哉閔子在家  
無怨其十三 貧而無怨在家必達信而好  
古亦足以發子曰有惡巧言亂德其十四



未喪斯文生德於予大哉孔子直哉史魚  
古之賢人今亡矣夫 其十五 惡夫佞者亡  
而為有今吾於人不以言舉察其所安請  
事斯語其十六 語之不惰可以為師未足  
與議士而懷居德之不脩學而不思其十  
七 篤信好學見賢思齊不知而作大車無  
輓欲訥於言三復白圭 其十八 慎言其餘  
可以為難死生有命上不怨天好勇疾貧

吾不欲觀其十九 勇而無禮同而不和今  
之愚也莫如之何終夜不寢取瑟而歌其  
二十

愁

落木蕭森華髮侵尋旅館寒砧空閨翠衾  
樂

嘉節在陳清光滿輪玉斝朱脣天地一身  
輓主內翰妻華烈婦

太初之始元氣氤氳二儀既肇剛柔遂分  
爰有夫婦以立人倫昌暉在陰王猷是循  
其一婉婉淑媛毓靈華胄克順克柔凝然  
閨秀貞心淵塞芳儀蘭臭習禮明詩壺德  
斯懋其二亦既有行作嬪君子象服是加  
動容成紀載采澗蘋以虔宗祀展如人兮  
寔邦之美其三煌煌良人利用賓王驥騁  
天衢鳳鳴朝陽迺作羽儀迺爲珪璋琴瑟

靜好以翔以翔其四生胡勿辰邁茲閔凶

所天一失五內摧崩叶誰謂與善天道膏

膏同穴之詠要以死從其五顧影自悼拊

膺晝號豈無螺贏不屬于毛弗卹其後孰

饗若教靜言以思我心寔勞其六迺立藐

孤選于公姓斬然成服從容畢命身殞名

全璧暉松勁嗟哉靈媛得氣之正其七亭

亭之石在山之岑斑斑之竹在湘之潯彼



美靈媛千載嗣音將愧後世有懷二心其  
八於昭義烈名寔不死使者采風上聞

天子錫爾典章式爾廬里詞臣作詩以告

彤史其九

講讀無逸館課

在昔喆王承統立極丕振皇風光昭令德  
內慎五典外賓四國相彼周公祇陳王式  
其一王式伊何其勤孳孳稼穡艱難君子

先知顧茲猷畝小人之依父母盡力子則

罔思其二殷之三后寅畏天命不敢荒寧

邦國嘉靖自時厥後聲色是聽甚知農事

名亦不競其三迨我文考明德惟純徽柔

懿恭罔敢侮人康功卑服保懷小民咸和

庶邦受命中身其四嗚呼嗣王無或耽樂

匪民攸訓匪天攸若在商李世王政苛虐

民則違怨中心如灼其五殷周令主迪喆

可師苟存畏柳厥德庶幾陳辭敷義微臣  
職司無逸乃逸王鑒于茲 其六

玄象山館詩草卷第一

玄象山館詩草卷第二

內史南師仲子興著草

東萊原一魁仲文選正

蘄春寇學海巨源編閱

魏郡崔邦亮德嚴校梓

弟 南企仲伯稚蒐集

五言古詩

陌上桑



燈下浴蠶種晨起採桑葉孰意狂風來摧  
殘不可摘一解蘭房睡正濃不知蠶已饑  
覺來雙淚流云到長城西二解携筐出閭  
里落日照顏紅使君陌上游駟馬何從容  
三解葉稀比黃金蠶大葉愈貴食盡日已  
沉小姑空相對四解莫謂繭猶鮮莫謂絲  
猶繁孤燈事機杼鬻得官家錢五解盈盈  
樓上女端居衣滿箱可憐養蠶人辛苦裂

東腸六解

新豐道中

曉發渭陽城莫過新豐里落日斷行人山  
烟傍馬起田夫荷鋤歸終歲耘與耔西風  
醒醉顏壯心驚逝水古今成代謝事業何  
窮已我生參三才貴以耀青史令名不蚤  
勗空負屠龍技跨馬長楊宮獻賦秋風裏  
夏夜不寐有懷賈魯玉

中夜何營營弱軀苦炎燠明月照墻頭輝  
光映喬樹暫是喜清風來復愁火雲著披襟  
理素桐邀涼敞蓬寓眷言懷美人展轉不  
可訴慈君長沙才囊著洛陽賦把手豁塵  
心一別鄙恡聚只尺已三穗而况千里去  
流螢晃羅幃宿鳥驚垂露感物生遠心揮  
毫多佳句直齋直齋玄象山應駐高人足凌晨  
跨青駘相尋諧夙悟

河梁曲三疊送張子歸江南

相逢燕市間相送潞河上羨彼河中流征  
帆同浩蕩一疊浩蕩日夜流載我行人舟  
舟行不見人我思何悠悠二疊悠悠河中

水悽悽送君行不用惜別離願言勗令名  
三疊

酌別朱子得太守五首

游子苦行役脩途復炎塵爰憇君子堂尊



酒重追尋飄風自南來旅思忽不禁麋鹿  
戀豐草宿鳥懷舊林眷言返鄉邑離情殊  
難任歡娛不踰時俄復歎商參握手不忍  
去淚下霑衣襟踟躕廣庭內浮雲蔽層岑  
茫茫宇宙間誰者稱知音

其二

知音久寐莫別君良歎難難豈為離別人  
情似波瀾媿我女蘿質託彼喬松端論心  
增繾綣揮灑落雲煙嗟彼競竒徒迺在字  
句間紛紛乖蹊徑大道揔茫然予也懷往  
喆撫膺增悲歎君氣凌千古憤惋握真筌  
宿心豈不慰風雅爾自還相期崇明德努  
力以加食

其三

加飡慎朝夕努力在壯齡我亦三十餘猶  
自未成名鼓瑟忤時好抱璞損其形所以

嵇阮流肅傲寡經營夫子文章伯事業復  
縱橫新詩滿溪野豐澤遍蒼生君將陟鳳  
閣予猶返渭城江湖渺浩蕩會面安可馮  
征馬在門端予心不皇寧杯酒聊斟酌為  
君重含情

其四

含情軹井里整轡沁水陽軹里人不見沁  
水日夜長予非齷齪流負氣慨以慷慷慨  
何寥落齷齪不可當因之寡世諧頰首空  
自傷詎意風塵中一言披肝腸死生從此  
誓何暇計行藏君有張季風結客少年場  
我才謝王生勉之抱關行豈不戀知己有  
親在高堂爰念堂上親辭君返故鄉

其五

故鄉渭水間水聲何泔泔行吟密時臺遙  
望阿房宮密時沒蒿草阿房只遺踪俯仰



千古事感慨灞陵東  
瞻彼二華山松柏鬱  
寵從小者常十圍  
大者與天通  
人事成代  
謝歲寒擅其雄  
歸采松柏枝  
殷勤托冥鴻  
君其念松柏  
歲寒與之同  
臨岐奏短章  
願言諒予衷

古意

高高誰氏樓  
直與青雲翔  
樓上二八女  
開奩靚曉粧  
粧成出門去  
袖拂丹霞裳  
婀娜

春風柳宛轉  
秋水光自言  
采桑人織手  
携素筐  
何物真傾城  
觀者填路旁  
使君駟馬來  
回車一相望  
踟躕不忍發  
詔以雙鴛鴦  
託言浣紗女  
越王載後廂  
聞之驚且疑  
令人增煩傷  
使君何其勞  
天地有紀綱  
矢心死不移  
夫壻况為郎  
長跼謝使君  
有妻勿采桑

送王宗道歸永昌四首



王生同里士寄跡在金山落魄狂者流意  
氣常翩翩家無擔石儲一擲百萬錢酒中  
忽大叫自言是謫僊揮灑旁無人能令和  
者難相逢兩莫逆千載托肺肝今來就我  
辭云指丽水灣寥寥幾知音予心重惘然

其二

握手渭城陰極目咸陽道渭水凍不流雪  
壓咸陽草如何春正初而子事征褭携壺

城西門餞此同心好堤柳不堪折令人傷  
懷抱斯須天一涯千里煙雲渺愛子荆山  
璞何憂售不早勉哉崇令名相將鑒穹昊

其三

憶到西平日春花正芬芳上堂辦豐膳下  
堂理青緗青緗何淬厲豐膳娛壽康長嘯  
空同山雲樹自低昂空同有玄鳥瑤華忽  
相將颯颯涼風生一夕渭河陽貽我白頭



吟勗我保馨香子其敦夙昔日夜永相望  
其四

人生歎居諸儵儵秋風至銀河倒地流  
寒眠桂砌曲池接潺湲鴈塔聳蒼翠  
戒僕夫振爾青雲翅一鳴令人驚再鳴蛟  
龍避誰者不空群僊花飄彩袂青萍會有  
時共醉新豐肆聯鑣望關河射策承明次

與康榕詩三首

良時不再至離別可柰何嗟我同心人  
駕言指滹沱餞子薊門西黃金鬱差我  
驅駒號中野傷心春草多人生百歲間  
逝如川上波相勗在千秋何暇計輶軻  
躑躅日已莫蕭然發嘯歌

其二

迢迢盧龍水煌煌白玉京青青道旁柳  
淒淒故人情故人不可挽對景增悲感  
南北

在頃臯此意何由展解我身上衣眷言加  
飡飯加飡慰饑渴解衣慎冷煖

其三

昔我依華山憐君宰晉陽今偕計臯來值  
子謁明光披襟成懽娛奚啻鴛與鴦如何  
一朝別令我摧衷腸行藏殊畫虎去住揔  
亡羊載分百里符况廼帝者鄉莫畏世險  
巖道直自生光垂綸豈不欲所歎在參商

願子瑤華函因風數相將

槐野舅墓下作

曉發密時臺午憇少華山密時已淪沒少  
華自岢嶺中有萬年宅澗水相糾纏舅氏  
昔謝世玉樹埋重泉意氣凌層霄文章空  
馬遷如何間世英徒增千載歎玄堂餘鼠  
跡松栢任斧斤往予薦牲芻池館晝自閒  
今來挹高風逸趾莫可攀斷碣尚舊題隧



道非故阡茫茫宇宙內歎識子雲玄握筆  
抒衷愴寒飈損愁顏寄語後來人無須佳  
城田

齋中雜詠六首

我有青銅鏡皎皎含清輝一從遠離別塵  
掩不勝悲孤鸞羞自照繡帶愁獨特鏡兮  
慎自愛卽歸整容儀

右詠鏡

我有綠綺琴彈來清遠心為念鍾期死無  
復抽妙音焚香聊一弄幽意在雲林琴兮  
慎自愛托以白頭吟

右詠琴

我有龍泉劍挾之燕趙走懷恩未易酬落  
日空低首歸來掛床頭時向囊中吼劍兮  
慎自愛行當豎不朽

右詠劍

我有鳳尾竹來從湘水干疑是神女珮對  
之聲珊珊俯仰千古事令人起長歎竹兮  
慎自愛與爾同歲寒

右詠竹

我有合歡衾云是端綺裁中夜守空床嫩  
人安在哉輾轉不成寐明月共徘徊衾兮  
慎自愛梅花夢裡開

右詠衾

我有萬卷書把玩清渭澣窮愁只故吾終  
歲徒自苦狂來幾欲焚空齋誰與伍書兮  
慎自愛藉爾友千古

右詠書

答巨源寄書時為蒲城令客

送子渭城門匹馬蒲城縣離別豈天涯經  
時阻相見西風吹正寒落葉復蕭散如何  
一水間脉脉增愁歎貽我錦雙魚烹魚生



春戀寥寥相如才臨叩歎顧盼嗟我草玄  
人端居空夜半床頭酒正香孰與開華宴  
遲子跨雀來潦倒青玉案良辰不可留儵  
忽春將變

賦得張惟訓

漢京有佳士翩翩琳與琅十歲握鉛槧發  
源許西庄外祖德涵太史才思擅八斗目下徧十  
行弱冠操郢雪聲華傾咸陽大道久榛蕪

斯人何昂藏一登作者途浮雲富貴鄉單  
父方鳴琴磬折厭旁皇拂衣常大笑五柳  
樹柴桑交結盡豪俠匡坐咏先王著書十  
萬言華岳揚晶光千載歸元化誰者踵其  
芳媿予黥淺徒因君祇自傷

秋夜感述

憶昔京華游壯志何揮霍結客五陵豪相  
看俱倬約懷璧屢見疑因之功名薄我生

天地間勉旃維著作胡為久離群江海空  
寥廓寒蛩響庭除西風動幃幕攬衣起旁  
皇對景增蕭索容顏非故吾明月猶如昨  
含思理素琴美酒誰同酌坐觀水上鷗兩  
兩相娛樂大鵬絕萬里而我苦羈縛吾慕  
滄霞人逝將跨黃鶴

東樓偶作三首

樓居澹無事終日見南山南山自崔嵬獨  
坐意悠然流水聽無盡白雲任往還地僻  
心俱遠相忘在人寰

其二

岩堯謝輪鞅神遊黃虞初古人不可見徒  
見古人書髮短心自長忽忽歎居諸天地  
亦寥廓我心日舒徐騷首弄雅琴西風吹  
庭除

其三



木葉當窓下寒蟬向我鳴故人天一涯雲  
樹渺縱橫縱橫動離思返照映柴扃觀彼  
雲中鴈嘹嘹不可聽百年無多日何事苦  
營營我思覓舟楫關河風浪生不如守故  
丘一醉卧前楹

夏雨園林赴約醉中書懷呈同社諸

君子

卧疴苦炎熱微雨度曉涼步出城東門山

色鬱青蒼修塗泥以濘垂楊夾道旁老馬  
識路岐農人斫柴桑參差敞亭榭芙蕖散  
新芳林深鳥語喧波靜錦鱗翔邀我同心  
友馳驅翰墨場斯道何羨蕪雕蟲熾且昌  
嗟予四十邁徒懷伏櫪傷人生百歲期誰  
滿三萬場所樂能幾何十九苦參商相與  
縱懷抱開筵列中堂沽酒新豐市徵歌青  
樓娼新聲雜燕語彩袖照松篁因思二三

月苑李覆短牆菲菲曲檻中魏紫間姚黃  
苑李尚可食姚黃香難將往古徒爾爾將  
來那可量縱有身後名不如掌中觴莫教  
眼前花復爾委穠霜

夜同伯淵過進父得客字

秋夜一燈明相看揔是客憐予潦倒徒賴  
爾慰疇昔共醉籬邊花論詩復岸幘朝來  
渭水頭應憶陶彭澤

送曹能始歸閩中

窮秋寒風至夕露爲嚴霜瑟瑟蟲在宇淒  
淒葉萎黃蕭晨感遊子眷言還故鄉僕夫  
夙已戒攬車越河梁出祖城之隅屏營周  
道旁安得酒百壺離憂令自忘鳴鹿求其  
群飛鳥不單翔况我携手好一旦成參商  
徽音日遼闊能不結中腸閩海天一涯悲  
此關路長願承秋明月冀以接清光



初入翰林言志 館課

東壁拱天居玉堂擬玄圃矧茲清切禁况  
乃圖書府典籍積充棟鐘鏞列堂廡風光  
浮砌草日華暎庭戶清池翔彩鳳崇觀羅  
繡虎曰余蹇劣姿濫厠多士伍一顧承隆  
恩華選欣接武負荷殊不克實慚析薪語  
念此三才身所懷在千古令模景前拓跬  
步循高矩仁道信不遐求斯繹其緒譬彼

梗梓材終煩郢人斧宿心託秋實無貴春  
花吐勵志毅以弘日月寡恒處勗哉重明  
德圖南謬期許驤首際黃虞樗櫟將何補

浩然吟 館課

方輿旣浩浩萬物何芸芸人生參兩間所  
貴唯長勤游心千古上冀與聖賢親已養  
孟氏氣還希宣父仁乘時猶神龍變化生  
屈伸阿衡負鼎鼉傳說比星晨乾乾翼王

室素業垂經綸伊余際盛世竊忝文學臣  
經術信已踈無補 聖明君感茲景往詰  
庶足隆斯民長吟以咏志聊用布吾真

惜陰 館課

大儀無淹御荏苒歲月適春華詎恒榮桑  
榆安足收聖人有遺軌所貴勗前修競茲  
一寸畧樹我千載馱夙興俟鷄鳴孳孳崇  
令謀仰師伯禹訓俯與陶公仇胼胝告平

成運甃示不偷曰余寔恐懼素心托冥搜  
斯道元無訛僣勉庶可求譬彼山澤農三  
時在田疇蔗菜能致功畢力方有秋寄言  
惜陰者尺璧非所侔

酉陽樓爲周啟明學憲作

茲樓何顯敞亭亭絕氛囂飛甍接浮雲交  
䟽流清飈顧彼高棲人倚檻臨山椒曾獻  
標秀色苑柳垂柔條莢李自紛紛倉庚亦



交交野外沮水清雲端楚山嶢心怡三春  
景目曠千里遙况復擬東壁克棟羅絃縹  
蒐竒徧名徵究古窮參寥惠子不足侔鄴  
侯豈云鏡博綜理自解玄覽神愈超匪爲  
好樓居於焉長消搖

坐嘯亭爲周啟明學憲作

周公薄遊者解龜遂初服抗節凌箕穎遺  
榮契幽獨睠茲考槃歌棲渾在適軸灑迤

城南隅高曠新營築啟扉俯清漳構室蔭  
嘉木依崖䟽石磴傍垣葺篁菊容與崇基  
上聊以送春日抱膝一長嘯清越比絲竹  
哀音激遠岑逸響振中谷雖復揚要眇因  
聲蕩誼濁鸞音信非擬鳳儀叶妙曲意愜  
解天弢情遣謝羈束永懷同調人蘇門有  
芳躅

春和勸農館課

太昊兆和氣谷風溫以清津津土膏潤交  
交春扈鳴山隅杏花繁池畔菖葉生 聖  
主念南畝豈不在蒸氓殷殷命田畯及時  
課農耕食爲八政首稼穡勤則盈田夫方  
野宿饁媚亦宵興秉耜向原疇荷鋤理溝  
塍良苗肅芊芊雨餘鬱青青耕耘無後時  
陳力去螟螣暴體固其常休逸非所營薦  
衮能致力三秋始有成獲歛登塲圃儲穡  
如坻京井稅早已輸聚室樂柴荆息羔報  
嘉歲息饗慶承平三復豳風詩庶識隴畝  
情

首夏時雨 館課

朱明肇氣候習習凱風吹浮雲膚寸合密  
雨何霏霏埴上鸛雀鳴階前草色滋初流  
華林苑復度芙蓉池因之蕩暄埃百卉挺  
芳蕤霑花含餘彩濯柳生新姿東郊罷灌



漑南畝務趨時嘉穀承膏澤欣此有秋期  
乃知皇天仁巨細靡不施飛蠕濡其潤動  
植荷其私淺才逢 聖世敢獻甘霖詩

送湯嘉賓翰編冊封韓藩

習習凱風流朱陽方赫曦我友肅 王命  
整駕當斯時彩旂影綠野朗鼓振中逵徒  
御旣駢駢四牡亦駢駢抗節遵嶠函遠見  
華山坻蓮峰高際天陵谷何透遲林樾帶

咸京隱隱出岍岐文后不復作鳳鳥何時  
儀旌旆臨西藩授冊重本支朱邱呈桐圭  
白社列羽麾中堂芳醴設樂奏金石齊授  
簡抽彩豪意氣凌雲霓鄒枚不足侔子虛  
並驅馳畢 命肅旋鑣舍策涉江湄昔躡  
雙屨遊今乘駟馬歸父老相顧歎閭里生  
光輝 上方好文學慎莫戀庭闈

南栢臺二首爲李本寧先生作

君家古栢樹挺秀何歲蕤始植自岳伯手  
澤含光儀娛親岳伯地太史牽遐思世考  
格穹蒼靈異猶菌芝卿雲擁成蓋甘露綴  
如飴九巖龍涸葉太清左紐枝復有菩薩  
文恠理恒若茲固知太史栢或有秦封時  
念茲墨墨腸益眷青青姿不似平泉木貽  
戒令人嗤

其二

孔檜載敷榮猶表宣聖瑞王栝挺葱菁已  
有梁棟噐茲栢僊李祥獨茂凋殘際枝留  
鳥鵲棲皮剥龍蛇蛻豈獨手澤存世資邈  
焉繫絲以愛日心啟以凌雲勢看來森梓  
橋聚處憐棠棣翠葉出重泉朱輪且十世  
欲知昌世期景純淮水誓

題張僉憲永思卷

高樹多悲風秋郊積霜露矧茲孝子心含



悽迫衷情眷言懷二人辛勤事農圃詩禮  
夙曾聞芳猷今已樹撫念罔極恩弃我不  
覆顧榮 命雖霑被隆養情良負瞻彼反  
哺烏于心有遐慕三秉不建親哀哀向誰  
訴

送孫聞斯翰編冊封益藩四首

凱風方戒候持節辭雲陞手奉削桐圭星  
輶向朱邱旣嘉長卿才乃設穆生醴金華

講初輟赤社疆應啟肅肅詠皇華因瞻使  
臣禮

其二

四牡就廣塗前旌指豫章夙旦命倅人凌  
迤越川梁匡廬多秀色彭蠡浩湯湯方舟  
泛中流逸思何激昂果愜壯遊情千秋幸  
莫忘

其三

于役既云畢省觀過僊里不須歌陟岵且  
自娛菽水彩衣戲庭前長筵列花裏奉觴  
拜嘉慶願言承燕喜白華有遺篇椿壽岡  
陵擬

其四

嘉會良未易凌晨越重闈清酒滿百壺出  
餞平生親感此雙飛龍綢繆殊未伸羽翼  
臨當乖中情難具陳高駕不可攀相期愛

令晨

送何公露僉憲江西二首

日馭轉南陸陶陶脩景移芳草暗遠郊苑  
柳陰道垂驅馬出郭門執手共徘徊徒御  
去駢駢念君當別離結交豈無因聚散亦  
有時綢繆匪一朝奄忽羽翼乖何以叙中  
情請唱驪駒詩雖非絲與竹慨慷自成悲  
浮雲停中野流波戀舊溪征驂不可執願



言長相思徒羨隨陽鳥清秋同奮飛

其二

與君相頡頏廼在承華南君趨玄武署予  
翔翰墨林遷鷺出幽谷鳴鶴已在陰物固  
各有求何況兩同心高言一以倡白雪自  
知音爲樂殊未央祗命適江潯載我盈  
尊酒遲留聊共斟中曲聲何哀無乃游子  
吟悵悵多苦懷雪涕不可任邈隔天一隅

所期垂令名安得楚澤蘭結贈君衣襟

青蒲規

閣試

蒸蒸佳氣滿鬱鬱帝王都彩雲浮紫禁赤  
日照青蒲青蒲臨廣內翠影耀金鋪昔聞  
忠臣心忠心竭皇圖匍匐青蒲上直入叩  
天呼慷慨申大義大義定須臾忠心旣已  
竭皇情亦已孚奠祚安磐石訐謨運天樞  
遺論垂金冊清風列玉瑚紀綱千古事應



籍至人扶

觀京兆宣

諭勸農

閣試

青陽屬農候原隰發新英翳翳柔桑陰夜  
來霖雨滋司農肅晨駕出舍就東菑念茲  
耕稼勤思彼成康時國史書大有周官頌  
豳詩伊余對芳節載筆趣彤闈苑花發  
丹萼宮柳垂碧枝因憶閭里間縣罄增淒  
其

賜楊梅鮮紀

恩

館課

嘉樹生南國枝葉挺歲蕤旣承華露潤復  
映朱日暉敷榮何煌煌結實亦纍纍糝丹  
耀綺巒流彩垂芳枝採摘自野人貢獻來  
彤帟護以層冰雪千里色不移豈徒味見  
珍所貴食以時美勝安平棗甘踰大谷梨  
馨香溢金盤宣賜出玉墀封題咸自天  
御氣光陸離擎來疑拱璧含之生華滋允



同和羨名信異肉食資自慚侍從臣何以  
答恩私

邀汪明生層樓翫月

遙空澄霽色圓景照層樓登樓誰與同眷  
言命良儔並坐頰庭槐列宿燦以浮扶光  
帶棲禽淪彩動潛蚪烁碁響蘭閨遠懷榆  
塞憂君固四方士亦復起鄉愁清夜不罄  
歡後會渺悠悠觴來謝不御獻詠獨夷猶

送秦女睦憲副赴蜀

朱夏景恢急凱風時飄颺攜壺城西門送  
子之華陽劔坂造雲天蜀道一何長叱馭  
念時艱栖息顧靡遑豈不懷苦辛夙志在  
騰驤歛彼晨風鳥遠集高林旁奮厲凌秋  
空燕雀安敢翔良無肅肅羽何以相頡頏  
贈別汪明生五首

步出郭東門送子返故林歸塗值蒸暑悽

側傷我心赤日行高天浮雲無停陰念茲  
行役客執熱殊難任徒侶行不畱白駒逝  
駸駸繫縻弗終日何以宣予忱我有盈尊  
酒與子聊酌斟

其二

君酌渭城酒聽我渭城辭臨觴無驩顏新  
聲轉淒其悵我同心人儵忽成乖離顧彼  
清渭流中有雙鳧飛雙鳧泛波瀾我友越

山陂自傷之比翼徒羨凌雲姿盛年當努  
力莫負千秋期

其三

千秋名可策景光未易畱憶昔結交時乃  
在帝王州寒暑六推移華髮已蕭騷豈  
無平生親恩愛獨難侔辭燕過衡茅逸軌  
淹園丘林水可娛心歸思日悠悠安得華  
山松以贈歲寒儔



其四

喬松發華滋我心期歲寒與子將離析執  
手成永歎客有郢中人爲我理朱絃淒緊  
商羽流哀思鬱且繁知音日以遠山水徒  
空彈舉世重媯哇雲門安足宣去去莫復  
陳修塗勸加殮

其五

加殮其自愛空林渺愁予遵路別良友攬  
袂長歎歔豈不念魏闕含情在潘輿我  
畱唸白華君行踰江湖雲中有歸雁當傳  
尺素書秦吳地雖邈分親若比居金石可  
銷鑠此意慎莫渝

舜華篇爲蕭季馨悼亡

舜華生中園英英何光輝朝作枝上榮夕  
莫沉黃泥彼媿妹者子秉德耀閨闈十五  
始有行託身同兔絲二十佐良人肘下印

纍纍三十建殊勲象服承 恩私建勲于  
何所迺在朔北陲孤城困群逆竒計不暇  
施橐金一傾散戰士軀可糜天狼殪長矢  
餘孽宵遁馳顧念素餐徒寧不媿筭禕景  
福固難量薤露誠易晞百媛信莫贖彤史  
有餘悲作詩哀舜華芳聲永不虧

為李溫父悼內

虞淵匿白日昧旦更東生如何貞嫺質一

往不畱形嗟爾出名家作嬪君子庭妙齡  
承姆訓蕙性芥藻成孝敬久愈篤中冓得  
儀刑貽珮克稱賢夢蘭叶其禎良人飛雙  
鳧出入勤戴星將膺象服 錫遽見殞舜  
英遺挂存空牀寧復覲芳靈芳靈不可覲  
掩袂泣吞聲



玄象山館詩草卷第二





